


ՔԱՐՈՉԽՕՍԱԿԱՆ



Տ. ԱՂԱՆ ԱՔԵՂԱ ԵՐՆՁԱԿՅԱՆԻ ՔԱՐՈՉԸ՝
ԽՈՍՎԱԾ Ս. ԷՋՄԻԱՍՏԻ ՄԱՅՐ ՏԱՃԱՐՈՒԽ
ՄԵՐ ՏԵՐ ԴԻՍՈՒՄ ՔՐԻՍՏՈՍԻ ԱՆՎԱՆԱԿՈՉՈՒԹՅԱՆ ՏՈՆԻ ԱՌԻԹՈՎ

(13 հունվարի 2018 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

«Եվ Նրա անունը Հիսուս դրվեց,
ինչպես հրեշտակի կողմից կոչվել էր»
(Ղուկ. Բ. 21):

Սիրելի՛ հավատացյալ քույրեր եւ եղբայրներ,

Հայ Առաքելական Սուրբ Եկեղեցին արդեն ութ օր է՝ մեծ ուրախութ-
յամբ ու ցնծությամբ տոնախմբում է մեր Տեր եւ Փրկիչ Հիսուս Քրիստո-
սի Սուրբ Ծնունդը եւ Աստվածհայտնությունը: Մեր Սուրբ Խորաններից
վերստին հնչեց կենարար Ավետիսը՝ Քրիստոս ծնավ եւ հայտնեցավ:

Աստվածային փրկագործությունը մեզ տանում ու բարձրացնում է
երկու զազաթների՝ մսուր եւ խաչ... անվերջ կարելի է խորհել Տիրոջ
Ծննդյան սուրբ այրի առաջ:

Տերը աշխարհ եկավ՝ որպես մի մանուկ, եւ երբ ութ օրեկան էր՝ ծնող-
ները Նրա Անունը Հիսուս դրեցին, ինչպես որ հրեշտակի կողմից կոչվել
էր: Այսօր այդ հիշատակության՝ Տեր Հիսուս Քրիստոսի Անվանակոչու-
թյան տոնն է, որը Աստծու հայտնության նպատակն է հուշում:

Ամբողջ Սուրբ Գիրքը Տիրոջ հայտնության պատմությունն է: Աշ-
խարհի արարչագործությունից սկսած՝ Աստված հայտնվել է մարդուն:
Աստված այսօր էլ հայտնվում է աշխարհին տիեզերական հայտնությամբ:
Աստված հայտնվում է հատուկ առաքելությամբ եւ ինչ առաքելությամբ

որ հայտնվում է, այդպես եւ անվանվում է: Ժամանակի լրումին Աստված հայտնվեց մարդկությանը եւ անվանակոչվեց Հիսուս, որ նշանակում է Փրկիչ: Աստված այսօր գալիս է՝ փրկելու մեզ չարից, սատանայից, հիվանդություններից, փորձություններից, մեղքից ու մահից: Աստված եկավ աշխարհ, որպեսզի մենք կյանք ունենանք ...

Հիսուս անվան հնչյունափոխված Հեսուս անունը հիշատակվում է Հին Կտակարանում: Մովսեսը հրեա ժողովրդին առաջնորդում էր Ավետյաց երկիր, սակայն այնտեղ մոտք գործեցին Հեսուի առաջնորդությամբ: Օրենքը մեզ կարող է մոտեցնել Աստծուն՝ փրկությանը, բայց Հիսուս Փրկիչ է մոտքը դեպի Ավետյաց երկիր, դեպի արքայություն:

Սիրելի՛ հավատացյալներ, մենք բոլորս մեզ շրջապատող աշխարհը անվանակոչում ենք: Անունները մեր հասցեներն են: Մեզանից յուրաքանչյուրն աշխարհ գալով՝ անվանակոչվել է ծնողների կողմից: Նրանք մեզ անվանել են կա՛մ իրենց ծնողների, կա՛մ որեւէ նշանավոր անձի, հերոսների անուններով, որով եւ ցանկացել են մեր մեջ տեսնել կամ մեզ ուղղորդել այդ մարդու անցած ճանապարհով ու իրականացրած առաքելությամբ: Մեզանով մեր անունը նոր երանգ ու գույն է ստանում: Սակայն այս մտածումը, ցավոք, շատերիս գայթակղության մեջ է գցում: Մենք ապրում, աշխատում ու տքնում ենք մեր անվան փառքի համար: Ցանկանում ենք այլեւայլ ճանապարհներով անմահացնել մեր անունը:

Մի փրկիստփա մի օր մտնում է լսարան ու պատի վրա գիծ քաշում: Հետո դառնում է ուսանողներին եւ հարցնում, թե ով կարող է այդ գիծը փոքրացնել՝ առանց նրան դիպչելու: Մի ուսանող մոտենում է պատին եւ նրա գծի տակ ավելի երկարն է քաշում: Ուսուցիչը ընդունում է նրա իրավացիությունը:

Սիրելիներ՛ր, մարդկային պատմության մեջ անունները կրկնվում են: Այսօր մենք ենք, վաղը՝ ուրիշները: Այսօր մենք մտածում ենք, թե փառք ենք բերել մեր անվանը, սակայն վաղը կգան ուրիշներ ու ավելի մեծ համբավ կունենան: Այսպես է եղել անցյալում, այսպես է հիմա, քանի որ ամեն ինչ անցողիկ է... Հիսուսի անունն է անմահ: Հիսուսի անունն իր մեջ բովանդակում է մեր բոլորի անունները: Մենք պիտի ապրենք ու ջանանք Նրա անվան փառքի համար, քանի որ միայն այդպես մենք մեզ կարող ենք անմահացնել:

Հայտնության գրքում Աստված ասում է. «Ով հաղթի, նրան թույլ կտամ, որ ուտի թաքնված մանանայից, եւ կտամ նրան Սրբության գիրքը ու գրված մի նոր անուն, որ ոչ ոք չգիտի, բացի նրանից, ով այն ընդու-

նում է» (Յայտ. Բ. 17):

Մեր Երկնավոր Հայրն էլ է մեզ անվանակոչում: Արքայության մեջ մենք տարբեր անուններ ունենք, որոնք ընդգծում են մեր աշխարհ գալու նպատակը եւ առաքելությունը:

Սիրելիներ՛ր, այսօր մեր բոլոր մտորումները մեզ տանում են դեպի անունները եւ մարդկության պատմության ամենափառաբանված ու օրհներգված անվանը՝ Հիսուսին:

Անվանակոչություն նշանակում է որեւէ անունով կոչել եւ կանչել: Աստված հռչակված է որպես փրկիչ եւ Իրեն պիտի կանչենք ինչպես փրկիչ: Քրիստոնեական մեր կյանքի բոլոր սխրանքներն ու հրաշքները կատարվել են այս անունով: Քրիստոնեության տարածման առաջին դարերում եւ հալածանքների ժամանակ ամենուր այս անունն էր հիշվում: Սուրբ նահատակները, առաքյալները, հայրապետներն այս անունն են հնչեցրել ու փառաբանել, այս անունով են ապրել եւ փրկվել: Բզկտված ու տանջահար մարտիրոսները որպես վերջին հոգոց եւ շունչ կանչում էին՝ Հիսուս, Հիսուս...

Սիրելի՛ հավատացյալներ, փորձությունների, հիվանդության, դժվարության ու նեղության, պատերազմի ու հաղթանակի, չարի եւ գայթակղության առաջ կանչենք մեր փրկիչ Աստծուն՝ Հիսուս Քրիստոսին, եւ Նա կփրկի մեզ: Հիսուս մեր շունչն է, մեր կյանքն է, մեր սերը, մեր լույսը, Հիսուս մեր փրկության հասցեն է:

Երբ մենք անունով կանչում ենք որեւէ մեկին, անձը գալիս է մեզ մոտ, արձագանքում է մեզ: Երբ մենք կանչում ենք Հիսուս, Ինքը՝ Փրկիչն է գալիս մեզ մոտ, լսում է մեզ եւ փրկում... Կանչենք ու ամեն ժամ մեր մեջ ապրեցնենք Քրիստոսին, որին փառք հավիտյանս. ամեն:

